

# Skýrsla svæðisstjóra Sögusvæðis

## Fjölgun í Sögusvæði

Það má segja að klúbbarnir í Sögusvæði hafi gefið hinni miklu fjölgunarleysisumræðu Kiwanishreyfingarinnar langt nef. Félögum í svæðinu hefur fjölgað um 29 á starfsárinu og auk þess bíða 7 félagar í Helgafelli eftir því að verða teknir formlega inn í klúbbinn, en það verður gert á árshátíð klúbbsins í haust. Þá bættust 6 nýir félagar í Kiwanisklúbbinn Ölver í Þorlákshöfn - á Gelluhátíðinni þeirra um miðjan mars og 2 bíða eftir því að verða teknir formlega inn í klúbbinn. Svæðisstjóri fór á Gelluhátíð þeirra Ölversmanna og sá um inntöku nýju félaganna og átti með Ölversfélögum og gestum þeirra, frábært kvöld.

Búrfell og Ós slógu saman sínum stjórnarskiptafundum og héldu hann á Kirkjubæjarklaustri. Þar minntust Búrfellsfélagar þess að liðin voru 40 ár frá stofnun klúbbsins og voru þeim færðar gjafir af því tilefni. Tel ég að þessir annars fámennu klúbbar hafi þar fundið leið til að gera stjórnarskiptaathafnirnar skemmtilegri. Ölversmenn héldu sinn stjórnarskiptafund í Ráðhúsinu í Þorlákshöfn og Helgafellsfélagar héldu sína árshátíð og stjórnarskiptafund í sínu klúbbhúsi. Svæðisstjóri sá um þær athafnir hjá öllum klúbbunum.

21 félagi var tekinn inn í Eldfell/Helgafell 21. janúar s.l. og 2 fluttu sig úr öðrum klúbbum yfir í Eldfell. Í Sögusvæði eru nú 4 klúbbar með 216 félaga.

## Nýr klúbbur

Starfsárið í Sögusvæði hefur verið líflegt og verður væntanlega áfram. 6. maí síðastliðinn var græðlingsklúbbur Helgafells, sem hlaut nafnið Eldfell, formlega stofnaður út í Eyjum og hafa 23 félagar gengið í klúbbinn og verið teknir formlega inn í hann en 9 bíða eftir inntöku.

## Gott ról á klúbbunum

Mér sýnist klúbbarnir í Sögusvæði vera á ágætu róli, þótt ólíkir séu. Ég er stoltur af Hornfirðingum að ráðast til atlögu við Umdæmisþingið. Búrfell er ekki fjölmennur klúbbur en ótrúlega öflugur og þar láta félagarnir ekki deigan síga heldur halda sínu striki sem aldrei fyrr og mættu þeim stærri klúbbar gjarnan horfa til þeirra í ýmsum málum. Ölversmenn eru líka stórir, flottir og öflugir fyrir sitt byggðarlag, en gera hlutina stundum öðruvísi, - þar er félagsskapurinn í öndvegi en formið sett skör neðar.

## Of margir í Helgafelli?

Hvað Helgafell snertir, þá gengur starfið þar ágætlega og klúbburinn mjög virkur. Á síðasta fundi klúbbsins fyrir sumarfrí var samþykkt að styrkja foreldra til kaupa á sérstökum íþróttagleraugum fyrir þau börn sem nota gleraugu við íþróttaiðkun. Það er kannski verkefni, sem klúbbar á landsvísu ættu að huga að. Börnin fyrst og fremst eru jú einkunnarorð Kiwanis. Þá varð einnig talsverð umræðu um fjölgunarmál klúbbsins en sumir vilja fara að hægja á fjölguninni, setja einhver fjöldatakmörk, en niðurstaða fundarins varð sú að halda áfram á sömu braut, - að nóg húspláss sé til staðar og ekkert því til fyrirstöðu að fjölga í klúbbnum, það sé bæði félagslegur og fjárhagslegur styrkur að stórum klúbbi og að “nýir vendir sópi best”. Áhugi á að komast í klúbbinn sýni að hann sé vinsæll og textinn í ÍBV-laginu góða, þar sem segir: “Komdu fagnandi” eigi líka við Helgafell.

## Mosfell og Eldfell koma í Sögusvæði

Þá fjölgar klúbbum í Sögusvæðinu á næsta starfsári, þegar Kiwanisklúbburinn Mosfell í Mosfellsbæ kemur inn í svæðið, ásamt Eldfelli. Væntanlega verða 6 klúbbar í Sögusvæði á næsta starfsári. - Það verður bara skemmtilegt að fá þessa klúbba inn í svæðið og gerir því bara gott að ég tel.

## Umdæmisþingið í Sögusvæði

Þá er umdæmisþing Kiwanis nú haldið í Sögusvæði. Þar hefur Kiwanisklúbburinn Ós, þessi 19 manna klúbbur tekið að sér þetta stórvirki og á eflaust eftir að standa að því með myndarbrag og ég segi fyrir mína parta, ég hlakka til þingstarfanna, sem ég veit að verða skemmtileg og ekki hvað síst að eiga samskipti við aðra kiwanisfélaga og njóta þess að vera á Hornafirði.

## Akkilesarhællinn

Við héldum fyrri svæðisráðsfundinn okkar í Þorlákshöfn 13. nóvember sl. Þar fengum við m.a. nærmynd af Ragnari Erni verðandi umdæmisstjóra. Annars er það sennilega akkilesarhæll klúbbanna í Sögusvæði

að þeir eru lítt tengdir við þá sem fara með stjórn Umdæmisins og hugsa því starfið í klubbunum sennilega þrengra en þeir klúbbar, sem eru í miklum tengslum. Tiltölulega fáir úr Sögusvæði hafa t.d. starfað í Umdæmisstjórninni.

### **Tú möts**

Seinni svæðisráðsfundinn ætluðum við að halda í Eyjum 9. apríl, en vegna samgönguvandræða varð að fresta honum. Ekki gaf til siglinga í Landeyjahöfn um þær mundir - sigling frá Þorlákshöfn var því sá valkostur sem í boði var. Að koma með Herjólfí til Eyja úr Þorlákshöfn á 2ja klukkustunda svæðisráðsfund, eins og t.d. fyrir Hornfirðingana hefði þýtt 5 klukkustunda akstur til Þorlákshafnar, þriggja tíma siglingu til Eyja og gisting yfir nótt. Og síðan aftur 8 klukkustunda ferðalag heim. Þetta væri því tveggja sólarhringa ferðalag. Þetta þótti tú möts. Við ákváðum því að fresta þessum fundi. En allir klúbbarnir skiluðu sínum skýrslum rafrænt.

### **Framtíðin í fjarfundabúnaði?**

Ég hef áður viðrað þá hugmynd að kannski lægi framtíð svæðisráðsfundanna, þegar langt væri að fara, - í fjarfundabúnaði sem nú er orðinn tiltölulega auðveld samskiptaleið. Held ég að við í Sögusvæði munum skoða þá leið, allavega í einhver skipti.

Gísli Valtýsson  
svæðisstjóri Sögusvæðis